

1539

*Senatus
oratoribus
Gallis re-
sponsum.*

quod ex illius utilitate, ac dignitate foret, prætermitturum; alterum, si Cantelmii opera uti Senatus nolle, optaret vero, ut alium ad negotium de pace peragendum Byzantium hominem mitteret, missurum. Re iterum in Senatu acta, ejus decreto, ordinario Regis legato, & Cantelmio vocatis, responsum est: nisi Cantelmus communes pro foederatis inducias obtineret, de concordia cum Turcis ineunda Reipublicæ nomine æquis conditionibus ageret. Id, præteritis iis, qui a Turcis Contareno proposita fuerant, respondere placuit. Petentibus vero legatis, eo quod Byzantio Contareno profectus esset, quo cum his de rebus agerent? Denuo Senatusconsulto adjectum est; nimium duras concordiae conditiones, quæ ab hostibus exhiberentur, videri; si ad æquiora descenderent, iis cognitis, Canali firmandæ pacis facultatem Senatum daturum.

*Annonæ a-
pud Venetos
inopia.*

Is erat ea tempestate status, incerta, atque inconstans adeo rerum conditio, ut variis veluti fluctibus jactata Respublica tuto, ac certo loco consistere non posset, neque expeditis consiliis se casibus, atque periculis eximere: turpem pacem, ac iniquam nolle; difficile bellum perhorrescere; cum ad reliqua incommoda illud quoque accessisset, quod magna annonæ inopia civitas premeretur, quæ mediis aquis posita, neque agris circumfusa, ad ingentem incolarum multitudinem alendam externo frumento, atque com meatibus indigeret: eoque anno frugum proventus imminutus adeo, atque tenuis fuerat, ut in propinquam hyemem omnium rerum, quæ victui essent necessariae, penuriam, ac famem quoque ipsam portendere videretur: & Gasparis Basalui Neapoli datis literis, afferebatur, frumenti inopia Neapolitanum regnum adeo laborare, ut gentes fame sibi pereundum pertimerent. Inter has belli difficultates, ob annonæ, ac frumenti inopiam versantibus, alia supervenere, quæ mentes ambiguas in diversa raperent. Nam per id tempus Maria, Hungariæ Regina, Cæsaris sorore, Belgium administrante, cum gravioribus tributis pressa Gandavi civitas in apertam defectionem prolapsa esset, Cæsar veritus, ne præcipuæ urbis exemplum reliquæ sequutæ, ad libertatem arrectæ, jugum excuterent, ad Gandavenes opprimendos, justisque poenis coercendos quamcelerrime in Belgium proficisci sta-

*Gandavi a
Cæsare de-
fectio.*